

**BOSNA I HERCEGOVINA  
FEDERACIJA BOSNE I HERCEGOVINE  
KANTONALNO TUŽILAŠTVO  
TUZLANSKOG KANTONA  
Broj: KT-RZ. 4/10  
Tuzla, 30.11.2010. godine**

**KANTONALNI SUD  
T U Z L A**

Na osnovu člana 45 stav 2 tačke b) u vezi sa članom 13 stav 3 Zakona o izmjenama i dopunama ZKP-a F BiH i člana 241 stav 1 ZKP-a F BiH, podižem

### **OPTUŽNICU**

#### **PROTIV:**

**KOLER IVANA zv. „Ivo“**, sin Koler Vladimira i majke Milene rođene Zarić, rođen 29.6.1972. godine, u Tuzli, nastanjen u ul. Mahmuta Bušatlije broj 14, Tuzla, JMB 2906972180005, po nacionalnosti neopredijeljen, državljanin BiH, bez zanimanja, pismen, Osnovna škola, neoženjen, vojsku služio od 18.3.1991. do oktobra 1991. godine u Mariboru i Valjevu, vodi se u vojnoj evidenciji Tuzla, lošeg imovnog stanja, osuđivan Presudom Općinskog suda Srebrenik broj K. 98/00 od 24.01.2002. godine, po članu 315 stav 3 KZ F BiH, 6 mjeseci zatvora uslovno 1 godina.

#### **ŠTO JE:**

U periodu od početka juna do kraja augusta 1992. godine u Tuzli, za vrijeme oružanog sukoba i rata u Bosni i Hercegovini, kao pripadnik Čete vojne policije Okružnog štaba Teritorijalne odbrane Tuzla, obavljajući dužnost stražara u Okružnom vojnom zatvoru u Tuzli, postupao suprotno odredbi člana 3 Ženevske konvencije o postupanju sa ratnim zarobljenicima, od 12. augusta 1949. godine, nečovječno postupao i vrijeđao lično dostojanstvo, činio namjerno nanošenje snažnih tjelesnih i duševnih bolova i patnji ratnim zarobljenicima, pripadnicima bivše JNA, koji su dana 15.5.1992. godine, nakon ranjavanja u oružanom sukobu na raskršnici Brčanska Malta prebačeni u bolnicu "Dr. Mustafa Mujbegovića" u Tuzli, a nakon saniranja povreda, lišeni slobode i prebačeni u Okružni vojni zatvor u Tuzli, na način da je: u više navrata ulazio u zatvorske sobe gdje su bili zatvoreni ratni zarobljenici, pa ih psihički i fizički zlostavljao, zahtijevajući da se postroje u red u stavu "mimo" i pjevaju pjesme koje im on naredi, upućivao im psovke i uvrede na nacionalnoj osnovi, udarao ih po raznim dijelovima tijela rukama i nogama, policijskom palicom ili drškom otpušivača za WC, a gumeni dio nekima od njih stavljao na lica, pa je tako :

- zarobljenika [REDACTED], koga je poznao od ranije, jer je s njim zajedno pohađao Građevinsku školu u Tuzli, u više navrata izvodio u hodnik tjerajući ga da mu pjeva i

recituje, pa ako ovaj to ne bi učinio, šamarao ga je i udarao policijskom palicom, vrijeđajući ga pri tome.

- zarobljenika [REDACTED] u više navrata iz zatvorske sobe izvodio u hodnik ili u WC, gdje ga je tukao po svim dijelovima tijela, upućujući mu psovke i uvrede, tjerao ga da pjeva i recituje, te da stoji tako dugo dok ne padne u nesvijest, a takođe i u zatvorskoj sobi više puta ga udarao policijskom palicom i pesnicama u glavu,
- zarobljenike [REDACTED] i njegovog brata [REDACTED], [REDACTED] i druge zarobljenike koji su bili u istoj sobi, tukao skoro svaki dan u sobi u kojoj su bili smješteni tako što bi ih poredao u red, a zatim svakog od njih udarao pesnicom, a to je činio često i sa policijskom palicom te drvenom drškom otpušivača za WC, dok im je gumeni dio iste stavljao na lice, pri tome ih vrijeđao i psovao, te jedne prilike [REDACTED] i [REDACTED] odveo u WC i od njih zahtijevao da piju svoj urin iz flaše, prijeteći, ako to ne učine, da će im otsjeći polne organe. Što su ovi morali i učiniti, a drugom prilikom zastrašivao ih tako što ih je izveo u hodnik govoreći im da će ih ubiti, pa je to zastrašivanje spriječio vojni policajac [REDACTED] koji je zatvorenike vratio u sobu,
- zarobljenika [REDACTED] jedne prilike tjerao da čisti WC, iako nije bilo vode, pa to ovaj nije ni mogao učiniti, nakon čega ga je udario policijskom palicom direktno u ranu na stomaku koju je on od ranije imao a koja je bila tek zarasla, usljed čega je [REDACTED] izgubio svijest,
- zarobljenika [REDACTED] jedne prilike u sred noći izveo iz zatvorske sobe i tu ga zastrašivao govoreći da će ga zaklati, te ga na hodniku udario policijskom palicom, pa kada je to vidio drugi stražar, spriječio ga je u daljem zlostavljanju, a zarobljenika [REDACTED] vratio u njegovu sobu,
- zarobljeniku [REDACTED] u više navrata u zatvorskoj sobi zadao po licu, po nekoliko udaraca otvorenom šakom,
- zarobljeniku [REDACTED] jedne prilike u zatvorskoj sobi stavljao gumeni dio otpušivača za WC na lice, a drveni dio mu stavljao u usta, i pri tome ga zastrašivao prijeteći da će dovesti njegovu ženu i djecu, te ih pred njim zlostavljati, a da će on i ostali u sobi to morati gledati i od njega tražio da mu kaže gdje mu stanuju žena i djeca, a drugom prilikom ga probudio u sred noći i zahtijevao od njega da napiše izjavu govoreći mu da će sutra ići na strijeljanje,
- zarobljenika [REDACTED] u više navrata iz zatvorske sobe izvodio u hodnik gdje ga je tukao po svim dijelovima tijela, upućujući mu psovke i uvrede, tjerao ga da stoji tako dugo dok ne padne u nesvijest.

**Dakle**, kršeći pravila Međunarodnog prava prema ratnim zarobljenicima učinio namjerno nanošenje snažnog tjelesnog i duševnog bola i nečovječno postupao.

**Čime je** počinio krivično djelo -Ratni zločin protiv ratnih zarobljenika- iz člana 175 stav 1 tačka a) u vezi sa članom 180 stav 1 KZ BiH.